

度

支

奏

議

度支奏議目錄

堂稿十二卷

急缺錢糧借帑接濟疏

司計罔裨投効罷譴疏

覆議原題軍興足用六款疏

更替湖廣催餉官員疏

遵 旨定限守催疏

進繳 聖諭疏

覆張通政輸將軍餉疏

神奸冒侵兵餉亟行追究疏

措發水陸運價疏

恭謝發帑並開款項疏

題覆津部催運薊餉疏

水陸之運綦艱督理之法宜備疏

酌議措餉未盡事宜疏

恭報解到鹽課及新舊餉銀疏

補還內帑金花子粒二項疏

再議措餉未盡事宜三款疏

金花積連認罪披誠疏

查明門軍銀米支銷的數疏

捷伐方張轉輸宜預疏

題覆閣部關薊餉銀疏

度支奏議卷之十二

太子少保戶部尚書淄青畢自嚴視草

急缺錢糧借帑接濟疏

題爲急缺援兵及主客兵錢糧懇乞代題接濟以
備戰守以保危薊事本年正月二十四日准兵
部咨該順天巡撫方大任題前事等因奉

聖旨據奏該鎮需餉甚急昨閱臣帶運無多該部還
速行措發延悞必罪該部知道欽此欽遵具覆間
又據監軍御史吳阿衡手本內稱准薊州糧儲

郎中何朝宗手本內稱見在援兵三萬五千七
百名今又續到河南營兵三千名山東營兵二
千名通共四萬七百餘名每名日支鹽菜銀三
分通共每日應支鹽菜銀一千二百餘兩今歲
正月蒙戶部止發援兵銀一萬兩支各官鹽菜
銀七日而銀已盡今各兵駐劄薊州除米豆通
津接濟可支本色其草束本司見買積十餘萬
束又有通州接濟二千束亦可略支十日本色
以後草束無銀可買其鹽菜銀係各兵逐日支

用者原無本色止給銀兩一日無銀勢必鼓譟等因前來看得薊門援兵雲集告支領餉時刻難緩若不多發餉銀何以應接烏合之衆今據三年分正月內發銀一萬諒可供七日之領今已踰期未見又發衆士待哺日迫萬難令其枵腹速爲多發餉銀以濟然眉之急等因到部該臣等看得薊門用兵兩月以來竭蹶供億不遺餘力不謂其呼之倍急而索之倍多也軍興浩費難以臆定臣非不知惟是量入爲出臣部兩

庫自正月至今所貯不滿二十餘萬除到隨發
所存特一萬八千一百餘兩留之爲京軍援兵
鹽菜之用已耳臣前疏中開列已明不敢再瀆
聖聽夫外解中斷點鐵無術致煩

皇上之焦勞切責臣實措躬無地驚惶欲死臣卽捐
糜總不能化血肉而爲金錢及查廣西解到銀
一萬二千餘兩太平府解到銀九千餘兩合前
在庫銀除支用外現發銀三萬兩臣於二十五
日差官黃文秀等解至薊門軍前以爲行糧

菜之用乃密鎮之呼餉又更甚也因與樞臣梁
廷棟商議薊與密安危相倚不得分緩急盡搜
兩庫所有又奏發銀一萬兩倒囊而出庫藏且
如洗矣臣思諸將戮力滅奴不愛髮膚以報
主恩臣何敢不竭心血以効供億而惟恐此給發者
尚未足以慰其饑渴之望也況

都門重地空匱堪憂緩急無備臣卽粉身碎骨何
補萬一今聞揚州府解有新舊餉銀八萬兩行
至濟寧去京纔千有餘里而徘徊不能卽至無

論薊門再呼空手難應且入衛援兵未撤豈能
枵腹以待乎伏望

皇上軫念將士之苦楚俯憐臣部之匱乏查有
御前不拘何項錢糧暫借八萬

沛發臣部以爲續命之膏救急之著今揚州府同知
郭澆現在賁捧稱

賀已畢責令星馳濟寧速催前來補還

內帑在

皇上妙轉移之仁而三軍露

優渥之恩在此舉矣。臣於是更有控焉。臣部但
餉然酌緩急而妙先後。則司餉者之責也。前
主兵當風鶴潰敗之後。各路營伍或非其舊。
槩言缺餉七月。則呼庚者果皆荷戈者耶。據
軍吳御史開報。援兵共四萬餘名。然非一蹴而
至。卽一月鹽菜所需不過三四萬兩。及查臣部
發餉。從前無論自正月後。發過通州一萬。前
初次一萬。二次二萬。三次閔臣帶去三萬。今又
發三萬。是旬日之間。已發十萬兩矣。餉司不能

酌濟應急而以太倉所發者爲舊餉專抵揚州
以新餉庫所發爲新餉專抵召買及援兵
言此則遺彼膠柱而鼓瑟是臣所未解也不
自軍興以來臣部新舊二庫請

旨通融支用固已久矣伏望

皇上允俞暫借八萬以備軍興急需俟揚州銀解到
卽行補還仍

勅令該餉司何朝宗通融接濟毋分畛域臣部決
敢少緩轉輸以自取罪戾也臣可勝戰慄

命之至

崇禎三年正月二十六日具

題本月二十九日奉

聖旨該部職司國計動稱匱乏藉口拖欠絕無綜稽
叅罰屢奉明旨竟甘違玩該科漫不經心所司何
事念方軍興拮据姑不深究其拖欠處所撫按有
司均當治罪已經差官守催且待奏報所請借帑
姑權宜暫發五萬兩朕無私財豈分內外但度支
料理安在輒冀以帑濟窮還着講求長策整頓一

新舊餉通融接濟卽諭餉司行欽此

進繳

聖諭疏

題爲

進繳

聖諭事崇禎三年正月二十九日恭接司禮監太監
宋晉等傳奉

聖諭朕惟國之所重在民民之所天在食日以狡首
肆逆近畿地方所在驚擾田畝空存幹止未定目
今地開氣暖東作可興恐百姓尚爾疑畏趑趄以
致農務愆期終歲何賴便著順天撫按卽行所屬

府州縣官分授招諭務俾以時耕種無復搖惑其
被殘地方有司仍多方勸相量給牛種俾安耕鑿
之嘗勿改承平之舊夫逆酋突變擾及民生失業
廢時深軫朕念該撫按等官還須加意拊循稱朕
德意朕且以奉行緩急定各官殿最功罪攸關毋
得泄視爾部院速傳諭施行欽此欽遵該臣等竊
照自逆酋肆深入之謀致郊甸惴蹙之毒近
已悔禍東遁我兵相機追勦屢次報捷驅滅可
期惟是風鶴之餘驚魂未定干戈所至荊棘必

當當此平秩東作之際不施招徠勸相之仁則
離鄉別井野外之哀鴻長鳴斷陌殘阡溝中之
捐瘠誰起幸蒙

聖心隱惻

天語叮嚀諸凡撫流移恤凋瘵資給牛種興復樹藝
凡有牛羊之受敢後芻牧之求除一面移咨都
察院行各撫按責成各府州縣遵奉施行外所
有

聖諭一道具本

度支奏議

進繳謹具題

知

崇禎三年正月三十日具題

題二月初四日奉

聖旨知道了欽此

司計罔裨効罷譴疏

奏爲司計罔裨鰥官自慙謹據實效仰懇

聖明罷譴以無悞軍

國事竊照臣以葑菲庸木謬膺度支之寄適當匱乏屢覩艱危臣事事從實行去件件從頭做起矢心竭力仰報

聖明之主絕不敢畏難苟安卽衰殘多病與死爲鄰亦不敢乞骸自便無柰敵患突發黔技益窘捫心自省積戾多端有不得不自陳于

君父之前者方虜未盡翹之先九邊缺餉在在脫巾
臣裒益調劑陸續接濟雖積欠之相沿已久而
勉強補苴惟力是視不敢諉也迨奴孽縱橫且
薄

都城之下援守兵馬一時鱗集雖事出不測急遽
倉皇而多方支應亦惟力是視不敢緩也迄今
畿氛未息需餉愈殷中外環呼遠近待哺既需
月糧又需行糧既急本色又急折色外解當風
鶴之餘尚裹足而不前邊鎮丁用師之際多大

聲而呼庚其難其危更有萬倍疇昔者卽令長才處此亦當束手况謏劣衰殘如臣曾一籌之莫展寧能勝任而無忝乎且臣自聞警以來宵旦經營凡九旬於茲矣手不停批目不停覽晝不得食夜不得寐今已心血俱枯昏瞶健忘寒裂面而不知其楚齒搖落而不知其盡肢體委頓動須扶掖狼狽光景萬目共擊臣卽欲振刷撐持而有所不能矣以極衰極殘之人擔極重極大之任復遭極艱極窘之時稍有不繼動干

軍機雖夙夜在公不辭勞瘁而勛力殫竭鞭笞
安施五夜撫躬且悚且愧誰司

國計而令匱詘至此竊恐溺職已甚補過無期與
其終悞軍

國不若先請譴責蓋臣一身之存亡生死不足惜
而

國計之有無盈縮大可憂也人知臣不如臣自知
之真人劾臣不如臣自劾之悉方今九列多賢
儘堪倚毗卽臣部侍郎中亦不乏心計之人伏

祈

皇上俯鑒臣力綿弱臣病貼危臣罪深重臣言迫切
亟

賜處分或念臣拮据微勞與之罷斥速推才望大臣
一員接管勛勑以足財用卽不然置臣法曹從
重議罪以爲司計無狀之戒苟有利於

社稷臣雖死瞑目也總之罷譴衰庸以伏從前之辜
登進賢能以襄計部之職誠有不容頃刻待者
矣爲此不避

斧鉞據實自効辰下部務浩繁軍儲緊急臣一面
力疾在署料理一面泣血陳情哀鳴懇

恩臣無任悚慄待

命之至

崇禎三年正月二十七日具

奏本月三十日奉

聖旨卿典司國計承平亦當竭力况茲虜氛未靖軍
興旁午正須大破積習寔圖幹濟何得投効自便
該部知道欽此

覆議原題軍興足用六款疏

題爲遵奉

明旨條議理財足用之策以佐軍興事先該臣部題
前事正月十九日奉

聖旨這條議六款着該部還同該科叅酌長便并有
未盡事宜一體商確具奏欽此欽遵當卽移會戶
科叅酌去後隨准戶科都給事中解學龍移稱
叅看得一省直加派之當議也夫四海臣民蒙
祖宗生聚三百年卽捐糜頂踵以赴公家之急固所

難辭但先派九釐在富者不過篋筐之餘而貧者則大有支持之苦再有增加恐滋騷動先年山東之妖起於窮民之嘯聚黃梅之變亦布有民窮之謠言草澤間伏莽有戎不可不深長思也則加派或所當徐議者也一北直加派之當議也夫率土之濱莫非王臣乃同是編氓則應一例加派先是以

首善重地特爲蠲免數年以來獨邀
皇仁誰不踴躍思效當此虜騎蹂躪而

畿輔之地獨罹荼毒又誰不抱同仇之憤若令典
省直同其加派又誰不欣欣切纓冠之誼者乎

順天係

輦轂之下永平爲殘破之餘自應照舊免議此外保
河真順廣大六府一體與省直同而於召買一
節量增以寓法內之仁此一款所當亟行者也
一生員優免之當議也省直鄉紳舉監生員舊
有優免銀兩近因遼事繁停而生員獨如故此
不過養士之虛名耳而優免丁口非其兄弟則

其伯叔子侄何曾有升斗實惠以相及乎且生員優免本身

國恩已自無外旣不能委髮膚以急

國難而乃欲庇宗族以徇私圖乎則夫扣徵助餉所當亟行者也一關寧餉額之當議也關外兵馬旣有調赴關內者則師行糧從無容再議但毛文龍原該額餉四十萬而袁崇煥何以驟加至八十萬海內物力豈容虛擲則此中亦須細覈除黔餉候

廷臣集議取自

聖裁外凡係關寧餉額總當亟議者也一賦役裁省之當議也賦役一書又奉

明旨虜警突至外報不前然此時正當飛檄急催完此一案而一面行令省直各官速查凡可節省者即便扣解無俟全書之成方爲遵守此自然之經制所當亟行者也一停支廩祿之當議也內外文職各官自七品而上一切俸薪柴馬本折等項俱停支一年本科具疏入

告已鑿鑿陳之矣至於在藉縉紳富民巨賈有捐資
者與廩祿一體解入各該撫按亟與題旌褒獎
此不過人臣致身之纖塵所當亟行者也以上
六款俱奉

旨叅酌長便故敢陳其膚見如此此外未盡事宜則
有榷稅事例二事當議謹開具如左等因手本
移送前來到部該臣等看得民爲邦本憫時者
每懷焚林之憂兵以衛民司計者深抱瓶罄之
耻昔以餉額未盈百方補湊猶可支持今何時

也遵永已經殘破恢復大費撻伐虜騎尚未驅
除征調更無寧日即目前軍餉匱乏非得一二
百萬金不足以解倒懸而況日後之增兵增餉
復當不貲額入有限費出無經此皆不可不爲
預計者也故臣部條具六議而首省直加派之
說蓋謂食土之毛者皆當分

主之憂且析之則每畝三釐所取非奢彙之則可得
百萬所濟不鮮目前急着似當出此但昨因黔
餉會議一事面晤臺省諸臣多以民窮賦重爲

憂又以奸民藉口爲慮亦屬遠計臣又竊念催餉諸臣見今卿

命四出催科之法必且峻於平時租稅之入亦當倍於往日若復再下加派之令恐非

盛世用一緩二與民休息之意科臣叅酌輿情亦謂當從徐議臣又何敢膠執已見也者則姑需之歲月通俟催餉完日再酌緩急以爲行止可也次則北直六府之加派亟當議復無容再計向者久邀蠲免之例總謂重

畿輔耳不知薊門蹂躪之後

都城危則畿南之州縣豈能獨安普天率土好義
終事當有同心除順永二府蠲免外餘俱一例
起科此後召買糧料俱量加增價值亦可蘇小
民之困苦矣士首四民素諳忠義年來獨寬優
免

皇恩則既渥矣士獨無所自効於危時乎通查海內
生員大州縣五六百名卽小縣亦二三百名計
一年所入可得三十萬兩足當一省賦役今自

崇禎三年爲始盡扣充餉亦不後其

君者之當然耳關寧兵餉載在經制原定四百八千
餘萬以爲本折二餉之費今入援者旣移駐於
薊門則應得之月餉自宜照例支給夫增于此
則縮于彼師行糧從是在閣部蚤爲分定而從
前之經制未可爲確據也更有東江之兵秦養
幾十年而

朝家未得毫髮之用頃復增餉至八十萬物力有
限樽節宜殷豈可付之逝波而不問乎科臣謂

此中亦湏細覈誠爲有見所當移會閣部稽覈
足定餉額者也臣部查造賦役全書原欲處處
裁省積少成多以充

公家之用非徒爲是觀覽考証虛具也客歲會議
集諸臣之長彙冊頒布而省直以故紙視之漫
不關心如

聖諭之煌煌何宜令一面咨報一面扣解不惟急公
之義無所逃抑亦回

奏之期無容緩耳辰下逆虜披猖震驚都邑政臣

子食不下咽之時膚髮尚不敢愛升斗豈復吝惜俸薪柴馬俱停一年直以

公家之賜還之

公家其何靳焉但省直扣解或不敢異同而太倉武庫多那移支用是必照舊造冊按季扣解留充兵餉之需乃爲實際若夫宇內大矣在籍縉紳富民巨賈豈無如卜式之樂輸者通行鼓舞勸助司府收解撫按題叙斯亦同仇之分誼宜爾也以上諸款臣實未敢自信科臣見謂可行

所當速飭修舉以收目前燃眉之急以備異日
蓄艾之圖者也至於

明旨所稱未盡事宜一體商確具奏近准科臣開送
關稅事例二款尚未講求畫一臣數日來廣詢
博訪復有一二管見統容另行題

奏以俟

聖明之採擇耳既經科臣移會前來相應具覆恭候
命下臣部轉行各該衙門遵奉施行

崇禎三年正月二十七日具

題本月三十日奉

聖旨這奏內省直加派自應徐議畿南六府既以
貧苦累加派不必行生員優免委多詭寄仍着
解東江兵餉正在查議關隘餉聽樞輔調發賦役
應裁酌先行扣解勿待書成廷臣捐俸已有旨
免勸輸聽士民自効撫按准與題旌國用不敷
從大款段處搜剔弊蠹講求長策毋得瑣細紛
徒滋論議欽此

更替湖廣催餉官員疏

題爲更替催餉官員事先該本部題差省垣守催
錢糧各官緣繇奉

聖旨急公大義臣子同心差去各官着會同各該地方撫按嚴責司道有司遵照部文款項設法區處以濟國用仍聽不時舉劾便宜行事爾部還照道里遠近分立限期來看若過限不應的該部科卽行糾叅差官并撫按同罪這差官俱依議內呂維寧原籍山西不便舉劾着與練國事換了各官當

以國計爲重功罪攸關毋徒借差自便該部知道
欽此又該本部題同前事奉

聖旨這酌定期限知道了各官到差限十日內先起
解三分爾部還立一到京限期與他如過期未到
卽將差官與地方官一同論罪餘仍陸續催催併
一應設處濟餉事宜俱着用心搜求不時奏解朕
念國用殷煩司農告亟特破格差遣各官責任匪
輕毋得因循取咎欽此欽遵隨卽劄行各官星馳
前往遵限守催外今據太常寺少卿劉先春奏

稱於本月二十三日接家報丁內艱合行回籍
守制等因到部查得劉先春既經丁艱難以前
往所遺湖廣催差例該另行差官更替今臣會
同戶科都給事中解學龍查有太常寺少卿
尚寶司司丞事唐暉在任空閑相應差委恭候
命下臣部劄行本官查照原題疏內事理并遵原限
前往督催施行

崇禎三年正月二十七日具

題本月二十九日奉

聖旨是欽此

遵 旨定限守催疏

題爲遵

旨定限守催以急軍需事該臣部題前事等因奉
聖旨這酌定限期知道了各官到差限十日內先起
解三分爾部還立一到京限期與他如過期未到
卽將差官與地方官一同論罪餘仍陸續催催并
一應該處濟餉事宜俱着用心搜求不時奏解朕
念國用殷繁司農告亟特破格差遣各官責任匪
輕毋得因循取咎欽此欽遵該臣等看得軍餉不

月
繼臣部大聲疾呼而在外諸臣秦越相視哀如
充耳仰賴我

皇上聖明洞徹天語有赫守催重以卿寺定以限期
其責成嚴切具可謂慈母之於癡子計之詳而
慮之周矣在諸臣念切同仇必不敢泄泄從事
惟恐省直撫按司府索鉅萬而應以錙銖又何
裨目前緩急乎恭釋

明旨差官到彼定以十日內那解三分仍慮解官之
延捱途次無可稽查而復責臣部定到京日期

臣已照道里之遠近定以嚴限刻期前來推遲
者有罪勿赦必如是而後可收臣部之匱乏於
萬一耳尤有說焉解官沿途逗遛希圖作弊是
其常態而驛遞裁減之後甚至有呼之不應者
經過州縣漫不關心求一防護之人而不可得
至今日藉口虜警各自爲計而其不應者更甚
矣此非臣之臆說也臣據德府解助餉銀差辦
官金得光口稱去年十一月二十七日卽至德
州地方一時外解銀兩同到者不下三四十萬

此時本州官員恐不便於地方逐之不容入城
不得已而暫移他處解官金得光正月初九日
起身時尚見有銀在州各官逡巡而不前者且
聞奸民剽掠路途梗塞驛遞旣不應付州縣又
不護送彼斃斃數役豈能保途次無踈虞乎臣
耳之所聞者皆云濟寧德州有銀望眼已穿竟
成思梅今細詢之乃坐此之故也臣之初念以
爲纓冠之敕內外撫按道府原有同心而今幾
無望矣文移督催不過故紙視之臣何敢乞靈

於人今差臣部山西司主事劉賜桂星夜兼程
馳至德州濟寧一帶地方查催解至銀兩作速
押發前來驛通州縣有違慢者卽令開報臣部
奏

聞置以重法自可以朝至而夕應矣除將應解三分
定限開列外伏乞

皇上嚴加申飭驛通州縣衙門凡錢糧經過刻期應
付則那借三分銀兩庶可實濟急用而不負

聖慮之惓惓也敢因開報定限日期而并及之伏候

聖明裁奪施行

計開

浙江省限本年三月內到京

江西省限本年三月內到京

福建省限本年四月內到京

河南省限本年二月內到京

山東省限本年二月內到京

山西省限本年二月內到京

陝西省限本年三月內到京

廣東西省限本年五月到京

湖廣省限本年三月到京

淮揚蘇松常鎮六府徐州限本年三月中旬
到京

應安廬鳳徽寧池太八府滁和廣三州限本
年二月到京

崇禎三年正月二十八日具

題本月三十日奉

聖旨這酌定期限期并差司官途次攢解知道了錢糧

經過驛通星速應付仍行防衛不得借口裁減
虜致有疎悞抗違的叅來重治該衙門知道欽此

覆張通政輪將軍餉疏

題爲軍旅大興

國計空乏敬陳一得之愚以速輪將以佐軍餉事
崇禎三年正月二十五日戶科抄出通政司通
政使管左叅議事張紹先奏前事內稱近日奴
賊未退其需外解錢糧何如其急不得已而差
官守催然弊端不除將不勝其催調停得當自
不必於催臣請先言其弊一弊在鄉紳之拖欠
一弊在青衿之拖欠一弊在奸民之拖欠今計

州縣之人不過此三項而總州縣之糧亦不過此三項分爲三冊開報明白預先投遞以便備查如鄉紳錢糧則專令巡方御史督之未完者有司報於按臣多則解究少則批追有抗違者指名叅奏如青衿錢糧則專令提學道督之未完者有司按月報名學臣輕則責治重則黜革至若軍民錢糧則專令撫院都御史督之蓋專官則難於推諉而分任則易爲催徵弊端除而調停當無不完之糧免守催之擾等因本年正

月二十四日奉

聖旨守催不專拖欠拖欠不專士民這所奏還着該部酌議欽此欽遵抄出到部該臣等看得京邊皆係維正之供臣子誰無急公之誼矧薦紳擔簪爵祿諸生誦法周孔爲齊民首而顧骹法逋糧與

功令抗或亦未必盡然蓋輸輓之不如期也有已徵在官而甲那乙用者有貯庫停頓而夏稽春解者有聽信囑託曲徇衙役而先緩後急者又

有運官怠緩領銀起解而逍遙中途容與客邸者今茲差官守催正欲痛釐此等積弊力翻此等陋規又或講求生節力滌虛糜以佐軍興之匱乏非盡因郡邑之善通也大哉

王言守催不專拖欠拖欠不專士民細釋

明旨真是洞悉吏弊鑒徹民隱奉差釋此可以明職掌而盡厥職有司釋此可以破積習而修歲事矣惟是鄉紳士民好義急公者固多恃勢梗法者亦有如通政司張紹先所陳三弊豈曰無之

蓋民間膏腴強半入豪右之家而有司催徵率
無奈南陽之問侵假而影射以開投獻之門侵
假而包攬以滋飛詭之計弊端百出正項愈虧
臣等久切扼腕則紹先入

告之言亦今日對症之藥石也但以鄉紳青衿小民
錢糧分爲三冊造送巡方提學巡撫各衙門督
催誠恐頭緒繁瑣案冊猥雜不便力行致難持
久莫若於歲終完糧之時州縣親查比簿鄉紳
士民除完納不開外但有拖欠溢額完不及格

者鄉紳則報之巡方青衿則呈之提學奸民則
申之巡撫或露章糾彈或親提追比仍具欠糧
職名細數報部題叅重懲永著爲令無得異同
作輟其間則豪強絕拖逋之竇而京邊無不完
之糧矣伏候

命下臣部移文各該撫按衙門遵奉施行

崇禎三年二月初一日具

題本月初四日奉

聖旨是欽此

神奸冒侵兵餉亟行追究疏

題爲神奸冒侵兵餉大干法紀懇

勅法司亟行追究以重

國計事案照崇禎三年正月初九日該臣部開報

軍興錢糧

奏繳文冊伏奉

聖旨支放餉銀數知道了其間頭緒甚多卿還悉心
磨對勿令重複詭冒軍興正繁資用不敷著悉預
計具奏該部知道欽此仰見

聖慮周詳無微不至前當虜騎薄城之時支放倥偬時刻難待安知無乘機混冒者隨即諭令新餉司新任郎中薛邦瑞邊餉司郎中王肇生加意磨對稽查去後續於二月初二日據新餉司郎中薛邦瑞邊餉司郎中王肇生呈稱蒙堂發下新舊二餉庫報到五日收放細冊及去冬

奏繳支放底冊職共逐一查覈磨對查得去年十一月十八日創新餉庫發宣府副將劉文光廩給塩菜銀七百八十三兩委官王元泰領解及

叅對二司案呈底簿並無發有前項銀兩亦並無各弁姓名隨即向庫查取原劄明係冒支無疑正查究問又據新餉庫主事陳觀陽呈爲給發廩給塩菜銀兩事正月二十七日奉本部劄付宣府都司孫啓宗領自正月十八日起至二十七日止官軍廩給塩菜銀共三百八十七兩四錢創新餉庫即便速給差官楊大志解赴該門司官取具實收繳部查考等因到職奉此隨據邊餉司書辦王萬俊持差官楊大志領狀赴

庫稟領前銀口稱差官楊大志係伊母舅因病不能赴領時因緊急之需已卽照數允給誠恐或有詐冒之情當卽差役押送該門並無官兵收領本日已同該書運回寄庫及至次日該書復赴領運職復差役押送又無官兵收領仍復運回嗣後未見委官赴領職恐急需不便耽悞或因移營不必給發理合呈請批司備查劄示以便銷算等因奉批新餉司速查究報奉此先據邊餉司王郎中移會正月二十八日據新庫

陳主事差皂役二人解銀三百八十七兩四錢
稱係邊餉司書辦王萬俊持有本部劄付領解
宣府都司孫啓宗鹽菜銀赴職口稟職以援兵
鹽菜銀兩自有委官領解書辦何以代領當令
原役卽將原銀帶回新庫收貯去後備查孫啓
宗原案應領鹽菜銀一百三十七兩已劄太倉
庫給發訖今復劄新庫事屬可駭明係捏領重
支一面吊查原劄一面行拘王萬俊乃徑逃匿
不出卽差人行拘王萬俊伊父王韶與貼寫夥

犯孟之梁到司審據孟之梁供稱前捏領劉文
光銀係王萬俊與同役書辦張應鳳所爲其分
肥情繇因萬俊尚未到官之梁不肯供吐查張
應鳳見與假印事發被問犯人胡華同住胡華
舊時亦邊餉司書辦久已革退係張應鳳上首
又拘胡華親弟胡九前來據胡九供稱張應鳳
原係伊兄胡華妻舅並無家室在胡華家內居
住於初四日續拘到王萬俊到司會同邊餉司
細加研審萬俊供稱正月二十七日乘空官往

門外查勘糧草數目知孫啓宗塩菜銀已劄太
倉庫遂私寫劄付一張浮增銀數套畫本官花
押涵請堂印親赴新餉庫冒領因新庫及本官
關防嚴密不得冒支前虛捏劉文光一起供稱
原與張應鳳同謀等情該兩司看得邇來軍興
倥偬支領紛紜兼以兵將征調無常去留不一
奸書王萬俊等因而生奸同謀作祟又習見新
舊二餉通融妄意兩庫可以涵劄彼此便於影
射遂假捏劉文光僞名乘機冒領似謂事後匿

影便無可稽查矣若非就案呈之底簿兵將之
原劄逐一磨勘卽有善察者又烏能破其奸乎
案查止有大同遊擊文光并無所謂劉文光也
止領庫銀三百兩並未嘗領新餉庫銀七百
餘兩也然支銷冊內已添一劉字則閃爍照應
其情僞深矣續冒孫啓宗三百餘金卽未得入
稅囊然而冒領有據夫復何詞祇因應鳳潛躲
二人猶得藉口曾不思三奸聲氣相倚機巧習
慣朋謀瓜分雖未供有確詞情弊業已昭然不

除肘腋之伏蠹難清錢穀之曲竇所當盡法以
正厥辜案呈到部該臣等看得援兵雲集供應
四出臣部固不敢以查覈而聽其稽遲尤不肯
以倉猝而任其虛冒前於惚忙之中雖經具冊
奏報而臣心惴惴不寧良以錢穀弊竇種種多端
恐將士之支領尚可稽查而左右之叢奸未易
窮詰也近遵

明旨益復凜凜責委新舊二司郎中細加磨勘兜底
清查而王萬俊等行徑遂畢露矣三人俱係積

書舞文實其故智當滿帥大戰之後文光已陣
亡矣乃乘諸兵殘潰之餘遂捏僞名溷割騙領
鹽菜銀七百餘兩奸胥之肉其足食乎天網難
容奸謀已敗又有孫啓宗之事若非新庫主事
陳觀陽差役押解而邊餉司郎中王肇生窮究
追還則此三百餘金將復入萬俊等之私囊而
不可問矣串通瓜分是此番之發覺卽從前之
証據也應鳳摯有多金一時豈能長往而王韶
胡華非其至戚則其夥黨饒有多貲追賠餉銀

務在通完更無容展辯者也犬羊未靖百務
紘臣媿未能先機而發奸已無所辭於溺職
罪然亦何敢令吞舟之漏網不亟爲桑榆之
此外一切軍興本折錢糧千頭萬緒豈敢草
臣恐二司事務惚忙又委主政趙建極盧化
公同加意磨勘倘有弊竇卽行發覺必不敢容
隱而養奸也除張應鳳未獲現在胡九名下
比外旣經該司具呈前來相應題

請恭候

勅下法司亟提王萬俊孟之梁等並緝未獲張應
逐一拷訊追贓究擬庶法紀振肅而弊竇清

崇禎三年二月初五日具

題本月初八日奉

聖旨奸書冒餉大千法紀王萬俊等着法司提鞫追
贓擬罪張應鳳嚴緝務獲該部近來給發紛紜還
慎加磨礱以杜詐弊欽此

措發水陸運價疏

題爲海運陸運並急運價分毫俱無時迫情迫懇
祈

勅部卽給以毋悞軍興事本年二月初一日恭接
御前發下天津督餉部院崔爾進題前事奉

聖旨軍興正急所請水陸運價着卽與措給該部知
道欽此續於二月初六日接戶科抄出督餉御史
沈猶龍題同前事本月初四日奉

聖旨運價已有旨給發該部知道欽此欽遵該臣等

看得閩寧本色俱仰給於津門春運屆期原不容緩兼以援兵集薊待哺如雲不惟水運急而陸運更急矣臣誼切同舟何敢以膜外視之而無奈如洗之藏不能供四應之需何也今津部與餉臣亦憐臣部之匱乏願兌給未到之銀兩備極苦心但河間京糧未便動用先分兩淮鹽課二萬兩令其差官赴河間兌支又分長蘆鹽課二萬兩令運司自行運解則春運修船腳價可借以支撐矣又分發

內帑銀五千兩發銅錢作銀二千兩以供陸運之
用水陸有備緩急無虞外解稍充自當遙候至
其酌量於先後裒益於多寡在津部自有妙用
而無俟臣言之喋喋也既經會題前來相應覆
請恭候

命下臣部移文各該衙門遵奉施行

崇禎三年二月初九日具

題本月十一日奉

聖旨這措發過水陸運價知道了以後還須取給輕

度支奏議

堂稿十二

三

齎銀兩不得鄒移別項以虧正額欽此

恭謝發帑並開款項疏

題爲恭謝

天恩發帑并開分撥款項以祈

聖鑒事先是臣部題覆順天巡撫方大任疏爲急缺
援兵及主客兵錢糧懇乞代題接濟以備戰守
以保危薊事本年正月二十九日奉

聖旨該部職司國計動稱匱乏藉口拖欠絕無綜稽
叅罰屢奉明旨竟甘違玩該科漫不經心所司何
事念方軍興拮据姑不深究其拖欠處所撫按有

司均當治罪已經差官守催且待奏報所請借帑
姑權宜暫發五萬兩朕無私財豈分內外但度支
料理安在輒冀以帑濟窮還着講求長策整頓一
新新舊餉通融接濟卽諭餉司行欽此欽遵到部

臣蒙

恩自天措躬無地當卽報名

廷謝隨差新庫主事陳觀陽舊庫主事馮世熙赴
內庫領出旋於初三日差委官蕭登瀛朱大成等
解發關外銀一萬五千兩解發關內銀一萬五

千兩發還兵部犒賞銀一萬五千兩解發津部
充薊門運價銀五千兩俱令兼程星馳刻期接
濟鄭重

帑金務期有當緩急以副

睿慮未敢輕用分釐也竊照臣部兵餉新舊各有定
額而一切徵兵之浩費不與焉近以庫藏空虛
通融於新舊之間以濟其窮今已三越月矣借
曩時之正供充目前之軍興以行糧而等日糧
之額以折色而償本色之費蓋藏有限責望無

窮揆之時事誠百年僅見之搶攘而今日異常之匱乏也臣愚點金無計鑿鼓何詞廼情窮勢迫冒昧而爲不得已之呼籲捫心拊躬大類馮婦無厭之求罪誠難逃萬死矣仰願

皇仁無私減損

上供慨發軍前是誠臣部回生之劑而三軍續命之膏也感激逾涯捐糜莫報自今伊始方將竭蹶支持尚敢徂那借於目前而不亟求長久之策以薄收桑榆之効乎正具疏間二月初二日又

奉兵部咨該閣部孫承宗題爲懇乞速發關寧
本折及賞功銀兩以濟急需事奉

聖旨卿在師中并將士勞苦深切朕懷已發御前銀
兩諭犒寬奏關寧本折時方急須卽着該部照欠
數并永平餉司額解及賞功銀依期措發仍嚴行
天津餉臣多備快船間道僱運敷卿調用務殲驕
虜該衙門知道欽此欽遵又於二月初四日恭接
御前發下巡閱御史張學周題爲回

奏帶給餉銀等事奉

聖旨閔寧軍興孔急更與他鎮不同這欠額餉銀并通州塩菜銀都着多方措發勿得延緩該部知道欽此欽遵其多備快船僱運事宜業咨行津部遵

旨奉行矣臣以閔寧缺餉憂心如焚兼以道路梗塞轉運可虞日夜焦愁所慮將士饑渴誠不啻身受之匪俟閣臣閔臣之

請而後爲措處也當

內帑三萬未發之先臣已於三十日撥兩淮塩課

八萬兩繇河間至天津從海道轉運分發關內
外矣極知三月缺額決非數萬可慰其望惟是
水面轉輸事屬創舉倘仗

皇上之威靈海若効順布置得法可以刻期立至此
後自當源源而繼并永平額餉亦酌議給發庶
幾寬杞憂於萬分一也密鎮需餉亦屬急切先
於正月二十五日發銀一萬兩令其通融爲新
舊月餉之用鹽課至日卽當再發至於通州城
守內有京營五軍標兵二管軍丁鹽菜銀兩例

於

京師給發昨二月初七日據委官朱一鳳蔣承功
張復顯領狀共領銀三千三百一十五兩四錢
已發至正月終止真保援兵向來未據報有確
數見在行文匄運主事林弘衍查明另行酌給
當不令其枵腹而呼庚也又臣前發通州銀二
萬兩解詣撫臣方大任亦作薊餉近據餉司何
朝宗呈稱准撫臣手本通州一萬閔院會留恐
不能爲薊兵之用果爾則通餉亦未至乏絕矣

所望疆場之間將士奮勇遂挫兇鋒毋徒逍遙
河上坐糜

公帑觀望不前卸擔缺餉則臣部與有榮施哉謹
具疏披陳恭謝

天恩并開發過閑密通銀數日期以祈

聖鑒臣曷勝惶悚隕越之至

崇禎三年二月初九日具

題本月十二日奉

聖旨這發過閑密通州各餉銀數知道了陸續措辦

并會津門布置海運該部還悉計行欽此

題覆津部催運薊餉疏

題爲遵

旨馳駐通州料理薊門糧餉謹陳催運事宜懇乞

勅部速議舉行以濟急需事本年正月二十六日奉

接

御前發下天津部院崔爾進題前事奉

聖旨奏內催運諸款俱於薊餉有裨該部速與議覆

欽此又蒙

發下津部崔爾進題爲恭報起運薊鎮糧料草束數

目并陳續運事宜事本年二月初一日奉

聖旨這運過薊鎮糧豆草束數目知道了兵勢漸集

還陸續接濟毋致匱乏該部知道欽此欽遵蒙

發到臣該臣等看得薊門援兵雲集所賴以資飽騰

而奏膚功者糧餉之力也當郡邑殘破供應固

爲煩難師行糧從轉輸尤屬不易今餉臣悉心

講求殫精料理凡所以爲運事計者幾無遺策

矣謹按諸款而詳覆之一議事權夫餉務紛紜

公移雜遝責任旣專事權不得獨輕則餉司

勅印似應給與蓋爲軍需重不得不爲司餉重也至
於書役等項應聽餉道選擇寧少毋多寧精毋
濫要當剔釐奸弊無使錢穀有尾閭之虞可耳
一議糧米查薊門主客兵馬悉仰給於務通者
轉運臣部已將通倉兌薊米石改於務關兌給
蓋謂道里頗近通倉不可以太空耳況津部奉
有

明旨目前水運尤爲便捷其不繼者則以陸運佐之
亦通變於未窮之道也一議料豆查薊門料豆

臣部派買一萬三千石而津部派運者又八千
七千餘石不爲不多矣內除灤州盧龍遷安豐
潤等處已被虜患應爲寬恤督臣又恐支用浩
費欲以原派河間豆五萬三千石轉運薊門量
增腳價計無便於此者但水運旣捷則不必盡
繇通州耳况開寧之馬匹已多調入關內是卽
以派之彼者移之於此而非縮彼以就此也
議運價查閔鮮水運冰泮開洋腳價所需萬不
容緩向以臣部匱乏未能應手近已撥發兩淮

鹽課二萬兌給長蘆鹽課二萬兩以充海運腳
價之費又發帑金五千兩制錢折銀二千兩以
充薊門陸運之費萬不至令其束手而仰屋也
一議水運舟車轉運勞逸相倍人皆知之繇津
至薊原有水路可通但當風鶴驚潰之後人多
却步頃督臣高價鼓舞不數日而運米萬餘石
自是權宜妙用但地近於開門而腳價反浮之
則亦不可以爲常也春和日永或不妨量議減
損耳一議總催夫軍興告亟接濟宜殷倘不專

委監催未免泄泄從事今議委津霸密雲三道
督率府佐等官分投查催自是要着仍乞

欽定限期責令二月以內運至信地仍以先後而分
賞罰庶事有專責而接濟源源矣一議雇車夫
漕米料豆襍然並運非得車輛廣集則日運幾
何津部差官在於靜海塩山并武清等縣分投
雇覓據疏可得七八百輛蓋縣令身親地方責
成甚易又奚虞陸運之不繼哉一議護運自遭
虜患以來迺兵悍民成羣嘯聚所在標掠若非

撥兵護送則車夫畏縮誰敢奮然前往撥兵護
送之議誠爲有見且寶坻姜黃口等處又係水
運必繇之地盜賊竊發更屬可虞督撫諸臣卽
當撥兵數百以爲該縣護送之用誠勢不容已
矣至於車夫運薊交卸之日若或轉令他運則
守候稽遲不惟往返不能過速抑且車夫必至
掉臂津部議令薊鎮餉司隨到隨收毋得留難
所當亟行申飭者也一議賞罰纓冠之救臣子
同心似無煩於再計但激勸不行則人心不鼓

如買運獨先宜特疏優敘其任意遷延不卽起
運者當以白簡繩之庶人知兢惕而輓運恐後
矣以上諸款重之事權以專其任揆之時勢以
措其宜又懸之

功令以課其成種種條議均屬運務急着所當力
爲舉行者也至於續運事宜猶有當商確者前
臣部以天津原設餉司管水運以新設餉司管
陸運已各有專責矣今津部以餉司新設運價
未領欲令通糧廳郎中丁流芳再運漕米完運

廳主事林弘衍量運草豆協襄運事諸臣自當
竭蹶以趨而應用運價則臣部給之但草束輕
浮若從陸運則腳價不貲如昨通州運草每束
草價五分運價五分共銀一錢一束大爲煩費
合無仍照臣部原議着令薊州附近州縣收買
轉運或令河間府屬沿河州縣收買從舟輓運
終覺價廉功倍則津部不可不熟計也姬文郁
原管陸運則親詣州縣督運米石召買料草固
其職掌津門司道原管關寧東江水運而薊餉

從水運者亦其責任據揭欲再留漕糧數萬厥
計甚周但開門內外之米用之不盡或可量改
薊門之用又有新留漕糧二萬石又存鮮運多
截漕糧二萬石儘可通融裒益此外仍俟漕輓
將終然後徐議增額截留可耳既經具題前來
相應覆

請恭候

命下臣部移文各該衙門遵奉施行

崇禎三年二月初十日具

題本月十三日奉

聖旨俱依議餉司勅書關防准給與運去糧料該督撫撥兵護送務於二月內至信遲悞必罪餘各着實飭舉續運事宜酌便行欽此

水陸之運綦艱督理之法宜備疏

題爲水陸之運綦艱督理之法宜備謹披瀝控陳
以速飛輓事本年二月初十日恭接

發下總督倉場尚書孫居相題爲恭報轉運凍糧事
奉

聖旨這運過糧數知道了春深水泮水運可行還着
作速催儼刻期報竣欽此又該臣部題前事奉

聖旨已有旨了欽此竊照阻凍漕米數至二百萬石
雖幸歛入城堡而一日未登之倉庾不敢遽信

以爲我有臣等仰奉

明旨俯竭綿力凡所爲較量程途稽核輪蹄撥派斛
斗者不啻舌頰俱憊矣且也京薊兩地水陸二
運應用腳價并修船製袋等項除坐糧廳給發
輕賚銀幾二萬兩不算外臣又苦措京庫銀一
萬餘兩湊給及查運過京糧纔一十三萬三百
四十餘石薊糧纔一萬七千二百餘石耳祇緣
道路遼遠陸運艱虞而車輛人畜又最渙散難
集臣部雖責成催僨終有鞭長不及馬腹之處

今幸水運通矣可望用力少而奏功多矣但往年母船原設抵壩今回空尚慮其遲求如往年之抵壩不可得也往年剝船雖少尚堪湊用今復燒燬九百餘隻卽勒令補修寧無時日之耽遲乎求如往年之措手不可得也往年事急則雇募民船協濟今奴賊尚未出境一切貿易視爲畏途求如往年之雇募濟急亦不可得也況石壩至大通橋仍隔慶豐等五閘爲商販不經之地又募船所難到而屢卸屢裝勢所必至且

借口夫疲袋少專圖攪土攪糠又錮弊積習所
不能頓革者也臣爲此懼除河干害糧責令管
運喻員外刻期先剋天津截米已經督餉部臣
崔爾進有疏具題自認發運并候

命下酌議另覆外及查鄚縣河干武清務閑城內俱
有漕糧鄚縣刻期可竣武清糧數尚少而惟務
閑糧多路近兼以城小人稀意外可虞相應勒
令雇夫星速抗負上船發運稍竣閑糧報竣而
後遞及武清可也然全靠水運而遂停陸運無

論與

皇上水陸并運之

明旨未符且一切協濟車輛收集甚難散逸可惜夫
水陸相濟而非以相妨倘可速搬升斗臣卽拮
据胼胝弗恤也但派車雖奉

聖諭而有名無實者尚多臣將一槩督責而搬運漕
糧夫固以臣部之事而求將伯之助者也臣則
何敢又將併付寬緩而漕事爲目前第一急務
屢辱

君命未能奉行怠玩之罪臣實任之又非

皇上曲體臣部之盛心也所有原派車輛內除涿州

新城定興三處准撫臣解經傳咨以虜警路衝

議與豁免俾令專精買豆似難再求其餘五城

及各州縣俱各派有成數所報併不足額且旋

來旋往如宛大二縣各報小車四十輛中城原

報中車二十五輛東城原報小車三十六輛西

城原報小車四十輛南城原報小車五十輛北

城原報小車三十三輛武清縣原報大車四十

輜小車二百五十輛東安原報小車八十五輛
灤縣原報小車十六輛通州原報大車十五輛
永清所報車輛雖各原無確數倘果好義終事
轉運自速今據管運員外郎喻思慥揭報止原
派武清永清及原未派霸州大城文安等州縣
尚有數車應運其餘止運一二運俱掉臂去甚
且以東作方興力竭星散幾於不可問矣臣部
卽嚴行檄催勒令回報竟無如痛癢不關之人
心何也其勲戚內監併奉

明旨止有

皇親左都督周奎遵送大車一輛

皇親都指揮使田弘遇續送大車一輛中車二輛
總督東廠司禮監太監王永祚司禮監太監宋
晉等二十一員共送大小中車二十一輛見在
轉運而此外則幾成絕響矣若不立法稽查勒
限輸輓俾他人共受急公之名而臣部獨當悞
事之實其何辭於

斧鉞也竊計河西抵京陸路僅一百二十里速赴

京交卸四日可得一轉而又大車每輛裝三十石
中小各車准照折算計日稽功或亦理勢之所
不容已也伏乞

皇上天語申飭務令大家輻輳衆擎易舉多運一石
卽

國家得一石之用而臣部之感刻相成又不待言
矣至於水次司官管發京通司官管收而沿途
稽查與開壩督促苦於無人諸事毫不應手今
查雲南司主事朱萬年在任空閒才堪集事合

無題委往來京通務關等處不時巡行或某處
阻滯或某事耽延卽爲調停釐剔報部究懲事
竣回部但恐輕貲不敷仍令隨帶見銀一萬兩
交貯通庫以爲雇船雇夫及水陸車脚之費姑
俟輕貲至日補還臣部雖窘迫至極此處自不
容吝惜者也迺若剝船有無足數排補何日報
先速處查核時刻難緩又若石土二壩舊例各
委州佐或通衛經歷一員管理運事合聽通廳
照舊委用仍令各置循環簿二扇如郵符急遞

之例凡遇糧運到彼該委卽明註某衛所糧若干某日某時到壩某日某時卸船某日某時轉發仍聽差去司官往來查算俾河無停運運無停畧於以裕軍

國而抒

聖懷未必無小補矣司官果能効勞底績自當一體敘錄若或因循悞事何所追於溺職之咎也

崇禎三年二月十二日具

題本月十四日奉

聖旨這凍糧水陸速運已有屢諭各處所報車輛着
如數如期趨役遲悞必究勲戚車輛有無多寡查
數具報遵前旨行添委司官往來督僭嚴禁攙和
併剝船排造委官註簿俱如議該衙門知道欽此

酌議措餉未盡事宜疏

題爲遵

旨酌議措餉未盡事宜事案查先該本部題爲遵奉
明旨條議理財足用之策以佐軍興事崇禎三年正
月十九日欽奉

聖旨這條議六款該部還同該科叅酌長便并有未
盡事宜一併商確具奏欽此隨經移會戶科查議
去後續准戶科都給事中解學龍手本移會將
六款叅酌前來已該臣部另疏具覆奉有

欽依外內有原開未盡事宜二款亦應具覆查得原
移本手內開一權稅之當議也嘗攷宋臣范仲
淹之言曰國用未減既不取之於商賈須取之
於農與其害衆孰若取之於商而趙開語張浚
曰民力盡矣錙銖不可加獨權貨稍存贏餘斷
而後行庶可救一時之急此兩人皆不得已權
宜之言而要不失爲斟酌之計竊謂今日田畝
旣難更加不如於各關權稅倍增之歲亦可得
數十萬但行之亦有宜酌者如粟米布疋綿花

三項皆貧民所需斷當照舊而其餘如金玉幣帛玩好等物非富商不能鬻非富民不能有量加以足餉事平卽止此於貧者固無干而於富者亦不爲厲且於先王務本抑末之意亦有合焉似可行也一事例之當議也夫該部事例行之已久然吏部畢竟拘於資格而各衙門効勞者盈千盈萬蠅營蟻逐其納例各官不能先也是以選者遲而輸者寡矣合無凡正官照舊以資格爲準而此外援納各官如運判提舉司府

首領州縣佐貳倉廵等項俱以今疏奉

旨之日立軍興事例名目每官應納若干而以輸納之先後爲截取之先後

御覽冊內俱註軍興字樣其舊格與効勞不得更肆鑽謀卽以二月一選爲始不但人人爭先

國計可裕而

御覽一定巧手難施但選期急矣似不可不亟行也
惟再加商確具疏奏請

聖裁等因到部該臣等看得目今兵連遼左寇入門

庭情形逾迫徵發倍增入孔有限出孔無窮欲
求補苴而不可得則科臣所陳固救時之急着
也科臣議加權稅謂米布綿花貧民所需皆當
照舊惟金帛玩好等物富商所嚮富民所買量
加足餉誠爲務本抑末之意及查南北各關舊
例有稅船料者有稅商貨者又有兼稅船料商
貨者俱係

祖宗朝舊制不可輕變似難一槩取盈商貨姑以關
稅舊額新增言之北新八萬兩潞野八萬七千

五百兩九江五萬七千五百餘兩淮安四萬五
千六百兩揚州三萬五千六百兩臨清八萬三
千八百兩河西務四萬六千兩以上二關因解
不足額臨清議減二萬兩河西務議減一萬四
千兩崇文門八萬八千九百二十九兩零此各
關舊額新增之數也及後臣部兩次每兩共加
羨餘一錢通計八關已增五萬如欲于商民船
貨之內另設科條歛稅之恐成法一變輿然喪
其出途之願合無比照舊例每兩再加二錢內

崇文門河西務新值虜倣商賈甚稀宜聽先後
補奏原額不必議增臨清亦屬北地虜倣之後
人多累足姑於每兩各加一錢通共各關歲可
增六七萬金衆擎易舉事便而商不擾至於罰
灰罰米爲公費用亟當嚴行各關禁革其寃欠
考成仍遵照舊例差未滿者不許推陞卽推陞
者仍須考覈勿托空言力爲舉行又南京宣課
等司爲貨物通行之衢設有南部司屬管理與
北京崇文門出納相埒何以額止一萬寔有遺

利宜行南部酌議再加二萬無拘舊額仍有江
西贛州稅銀二萬與福建汀州稅銀數千昔年
以贛撫用兵議留今當通行解部充餉者也科
臣又謂事例行之已久吏部畢竟拘於資格多
爲各衙門効勞得之議將援納各官另立軍興
事例查照資序明註

御覽冊內以便取選此意甚善蓋舊行事例有援納
職銜者有援納徑選拔選者今已漸覺積薪人
苦株守令無另立薊遼軍興事例無論資深年

深乞年拔選凡應選而未能遽選者許令照依品秩銀數則例再倍加銀兩名爲卽選除造冊進

御覽外仍咨吏部題入軍興自爲一項每次取選年資雖不妨並論而中有納過軍興事例者卽盡數先儘軍興而後及其餘仍就同事之中又以納銀日期先後爲截取之先後卽難盡選亦須十取其七凡年資應選暨從前加徑選拔選者不得攙越効勞冠帶一槩停選無容鎖管至每

選選過軍興事例若干員名逐一開明曉示則人兢爭先而輸納恐後矣然臣又有說焉事例一項貴於畫一頃見工部

請開事例奉

旨酌議列款夫工部之銀給商銀色低雜亦無不收臣部之銀發充兵餉銀色低潮不能混發是以兩部並開人必兢趨工部而臣部之事例斷無有應命者故舊行事例自崇禎元年臣部與工部合併收納三七分用自二年八月後隨以遼

左盈甲盡借爲工部用且半年矣若借其用於
平時而專其利於此日恐非公平正大之體料
工部必不爲也合令工部會同臣部共議事例
款項總名軍興事例仍聽臣部以三分與工部
其七分臣部向以充京邊之用今東事危急自
應專供軍興所賴銓部以軍

國起見應爲主持以濟臣部之窮匪淺鮮也南京
戶部自天啓元年每歲定東征事例銀十萬兩
原爲濟遼而設天啓四年雖留爲南部錢廠鑄

本然亦解充遼餉天啓六七兩年又該本部題
作銅本惟崇禎元二兩年南京兵部等衙門合
詞

請留臣部覆奉

明旨准暫借用今歲已屆斯當卽解還臣部仍充遼
餉不容再遲者也以上三款皆科臣所條議者
臣部稍爲酌量推廣以順其指歸而補其未備
倘蒙

聖明採擇舉行其於軍興軍餉必有濟矣

崇禎三年二月十二日具

題本月十七日奉

聖旨南北關稅依議加額還立法嚴飭無令權司借
端生擾軍興事例仍與吏部酌議選法速奏工部
款項分合并著商妥不必互執南部借過遼餉銀
著行補還該衙門知道欽此

恭報解到鹽課及新舊餉銀疏

題爲恭報解到鹽課及新舊餉銀以慰

聖懷事案查本年正月十三日恭接

發下臣部題爲庫藏萬分匱乏等事奉

聖旨這解到金花等項銀兩准暫借用李繼志帶日
鹽課便著李若星查催不拘何地俱勒限星速前
來李繼志押發交明具奏該部卽移文去欽此遵
卽星馳差官李養治前往守催併移咨總理河
道加從二品服俸工部右侍郎李若星查催去

後嗣於二月初十日准總河部院咨稱本部院督兵入衛抵城下列管虜已東遁隨奉

旨回鎮於正月二十日據運同李繼志稟稱解銀前進不意虜警甚熾錢糧干緊不敢進解暫回濟寧探聽消息等因本部院看係緊急錢糧立等接濟兵餉需用甚急難容怠緩速催起行又准本部差官李養治咨會前因隨發憲牌撥夫沿途護送添差官舍黃家臣王國鎮押解於二十一起行赴京交納擬合回覆等因准此又據

河間府知府王逢元呈稱遵奉明文差人查催
兩淮解官運同李繼志原解鹽課銀兩直至濟
寧續據本官將銀四十一萬用小車夫於二月
初三日晚間推運到府隨承兵道蒙天津部院
行奉

旨分解銀八萬給關門內外兵餉彼時繼志卽分銀
四十鞘委原來人役八名解赴天津部院稱允
查發本府又委推官呂弼周統領官兵百名押
解天津交納又奉本部院劄付再分二萬作運

價一并解津餘銀三十一萬本官自濟寧回奉
本部劄付令自押解本府又委同知白麒領
總張武全等官軍百餘護送至涿聽保定撫院
解經傳護解務保無虞等因又據本部原差司
官劉賜桂稟同前事據此爲照向以逆孽猖獗
門禁戒嚴訛言流傳輪蹄觀望有中途徘徊而不
前者臣部數月以來拮据之苦窘迫之狀亦既
屢荷

聖明鑒照矣

大語有赫星催外解臣部卽刻差官李養治追趕鹽課銀兩又題差司官劉賜桂沿途查催各省起解在途銀兩續於二月初十日俱抵

都門兩淮鹽課除解發關寧八萬天津二萬分解工部四萬餘兩外其到部者實有二十七萬一千五百餘兩又揚州府差官蔡清純解到新餉銀三萬九千六百餘兩舊餉銀五千二百九十餘兩常州府差官樊彭齡解到新餉銀一萬三百九十餘兩舊餉銀一萬二千八百四十餘兩

松江府差官黃文奎解到新餉銀八千九百三十餘兩舊餉銀三千四百七十餘兩河南汝寧府差官丘之龍解到舊餉銀五千五百餘兩山東布政司差官俞光憲解到新餉銀二萬二千四百五十餘兩舊餉銀一萬二千八百四十餘兩太平府差官劉憲解到新餉銀一萬四百二十兩零舊餉銀一千四百六十餘兩江西布政司差官江雲鵬解到新餉銀七萬一千一百九十餘兩北新關差官王萬年解到舊餉銀六千

六百八十餘兩以上共解到新舊餉銀四十八萬二千五百六十餘兩此外又有解到

上供金花銀五萬七千四百五十餘兩巡青京糧銀一千三百六十餘兩宣鎮銀三萬九千九百五十餘兩工部光祿太僕等衙門銀六萬七千餘兩此皆歲內應到之銀一時湊集於目前非賴我

皇上之威靈及總河李若星保撫解經傅知府王逢元之督催恐解官急公之心終不勝戒懼之心

又烏能不疾而速也臣當此仰屋沿嘆束手無策之日而外解漸至如貧兒之獲重寶不勝喜動顏色然而喜心終不勝其憂心者何也各鎮缺餉業已數月在在睂然處處眼穿首

京師次薊密昌易又次關寧以及宣大山西延寧甘固等處無不大聲疾呼者無論遠近總

皇上之封疆無一處不當照管勲戚衛所官俸并京營料草鹽菜等項無一項不當給發動以數十萬計臣部衷多益寡萬不能副其取盈之願而

庫藏塵封又將復俟後來之續解臣於此滋懼
矣仰體

聖慮周詳軫恤

國計不勝五夜焦勞外解一至敬用恭報以慰

聖懷於萬一容臣給發各鎮後再詳開上

聞謹具疏題

知

崇禎三年二月十二日具

題本月十五日奉

聖旨這報到外解銀數知道了該部須酌量緩急
第給用毋得頓行支發致有不敷欽此

補還內帑金花子粒二項疏

題爲外解漸至

上供難稽恭進金花子粒二項少補

內帑事先該臣部於正月十四日題爲庫藏萬分
匱乏仰懇

聖慈暫那

內供銀兩并速催淮課以濟軍興事奉

聖旨這解到金花等項銀兩准暫借用李繼志帶回
鹽課便着李若星查催不拘何地俱勒限星速前

來李繼志押發交明具奏該部卽移文去欽此
遵隨將廣東解官聞人瑋解到金花銀五萬兩
河間府解官王廷中真定府解官白金張崇德
解到子粒銀一萬八千一百七十四兩一錢八
分一釐二毫七忽四微九纖著令新庫主事陳
觀陽舊庫主事馮世熙照項查收分發訖竊照
臣佐計無能瓶壘遺恥當軍興旁午仰給外解
而竟成望梅萬不得已冒昧呼籲請乞
上供豈不知金花子粒皆

上方所急需正慮不足安得有餘而那借於臣部臣
跼天踏地竊懼無所逃於萬死矣仰荷

皇上深軫

國計特頒

俞旨斯時也不惟少救臣部之倒懸亦頓慰三軍之
饑渴矣然臣感激之私與悚仄之念交集於胸
中而日夜惴惴不敢卽安者總以

皇上俯憐臣部之危急念念關切臣不能仰體
聖懷而少圖報荅於萬一非夫也今幸

威靈有赫外解繼至雖關寧九邊月餉缺額者爲數
不貲城守應援口糧待哺者奢望難滿行潦之
水終當隨酌隨竭惟是

上供銀兩一日未補則蟻懷一日未寧謹差管庫主
事陳觀陽馮世熙將解到新舊餉銀內以五萬
兩進還金花以一萬八千一百七十四兩一錢
八分零

進還子粒至於近借

帑金五萬亦當一併恭

進但臣部目前支應千頭萬緒那西補東以期
緩須與之疾呼稍俟外解再至卽行補
進必不敢遲緩以取譴謫也伏乞

勅下該庫照數查收施行

崇禎三年二月十四日具

題本月十七日奉

聖旨追還進金花子粒銀兩着該衙門照數查收餘
知道了欽此

再議措餉未盡事宜三款疏

題爲再議措餉未盡事宜以濟軍興萬一事先該
臣部題爲遵奉

明旨條議理財足用之策以佐軍興事正月十九日
奉

聖旨這條議六款着該部還同叅酌長便并有未盡
二事宜三并商確具奏欽此隨該臣部會同科臣解
學龍酌議具題正月三十日奉

聖旨這奏內省直加派自應徐議畿南六府旣以召

買苦累加派不必行生員優免委多詭寄仍着徵
解東江兵餉正在查議關寧餉聽樞輔調發賦役
應裁的先行扣解勿待書成廷臣捐俸已有旨諭
免勸輸聽士民自効撫按准與題旌國用不敷還
從大款段處搜剔弊蠹講求長策毋得瑣細紛更
徒滋論議欽此欽遵臣捧誦

綸音倍切惶懼竊念臣以謏劣之才當盤錯之會心
雖同於精衛術實闇於點金昨以狡虜啓疆
國用愈詘謬陳六款自知瑣細無當幸荷

聖斷酌議行止臣部業奉以從事矣第天地生財止有此數不在官則在民粵自遼左發難以來羣議盈庭利析秋毫今欲徵之民而閭閻告竭欲取之官而左藏如洗捉襟堪憐扼腕無策此臣所以日夜芒刺廣詢羣策欲資補濟於萬一也除科臣解學龍開送權稅事例二款已經題覆外所有區區管窺之見仍得三事其二係鹽筴其一係倉庾皆遵奉

明旨所謂從大款段處講求者敢再昧死爲

皇上陳之一議新增鹽課之應存也查得天啓六年
該臣部題覆工科給事中楊所修疏議將各運
司每引量加鹽課以助

大工在兩淮運司加銀七萬九千六百一十四兩四
錢兩浙運司加銀三萬一千一百三十三兩八
錢三分長蘆運司加銀一萬二千一百九十四
兩山東運司加銀六千四百三十七兩三錢七
分福建運司除題減外加銀一千五百八十六
兩八錢廣東提舉司加銀五千四百一十二兩

一錢二分河東運司加銀八千四百兩陝西
州鹽課司加銀一千一百八十六兩七錢四分
以上各運司提舉司共增銀一十四萬餘兩原
議工完卽止已於崇禎元年二月內題
准停罷在案至元年十二月內復該工部以
撥工繁費咨會臣部題

准再徵元年一年各已陸續解交工部完日卽當停
止矣但今

國家遭百年未有之變處極窮至迫之時曩所本

無尚且議增昔所本有豈可議減合自崇禎
年起照舊加徵以濟軍餉候事平停止夫夷
蹂躪率土同仇富商大賈正宜樂輸諒不以
厲也一議加引加鹽之當行也查臣部於崇禎
二年採集

廷議曾有加引加鹽之議通行省直今止據兩浙
運司加引三萬道增課八千兩其餘尚未有以
報也夫以天下之大四海之廣生齒日繁而所
行之鹽僅如舊額豈不尚有遺利哉良以私

充斥而

公家之利盡爲奸徒吞噬耳卽如淮鹽割沒一項
乃因引鹽多帶附餘之數而增加之以補正課
之不足者是卽不加引而加鹽之說也但聞每
引該割沒銀二錢據所報解似有未盡當此軍
興緊急之時仍當盡行清核以爲

國家之用其他運司亦可倣而行之卽不盡拘
錢亦豈遂無數分所謂錙銖而積毫釐有益者
也合無

新各鹽臣禁緝私販量議加引加鹽引加則
國課自增鹽加而正額亦廣商不稱病

國計有裨何憚而不爲乎再查天啓六年兩淮
臣陸世科議行和州含山等處食鹽二萬九
餘引每年徵課三萬兩以抵杭州織監

袍價至崇禎二年鹽臣張養以織造停止題將
銀停免已經臣部覆

准在案但

袍價雖停而地方之鹽斷無不行之理鹽既行

課必不免詢之于衆僉謂可復宜令盡解臣部以充軍餉每年可得三萬兩未必非軍糈之一助也一議各倉存積之宜解也

國家自京通各倉外沿河一帶設有天津臨德淮徐五倉查京通各倉每報掃積餘米動至數萬而沿河各倉無聞焉則以隔遠而照管不及也淮倉原兼管四稅內以二萬五千兩充本地支用以五千餘兩解京充舊餉徐倉原兼商稅歲額四千餘金內淮撫題改軍餉四百兩實解京

三千六百餘兩充舊餉自天啓五年淮徐二倉各題增新餉一萬五千兩乃年來實完不及額率多高閣置之今當照數亟催如年終不完者卽令會撫按回

奏要見因何不完其不解又不奏者臣部執白簡繩之此外天津近京臨德無稅向來未有額定新餉案查萬曆四十七八年以至天啓四年間臨德徐淮管倉司屬宋統殷周思兼劉弘宇楊所蘊均以東事各有搜助銀項多者鉅萬少亦

數百又天啓四年徐州管倉主事張璇曾搜
兵餉銀一萬二千九百餘兩又搜括修城銀二
萬兩天啓七年德州管倉主事徐天鳳遵奉部
劄兌給薊州餉銀一萬兩永平餉銀二萬兩今
據天鳳回部考核冊開德州倉見有存銀三萬
九千一百四十餘兩而常豐倉積儲以待放軍
糧者尚三萬有餘此實天鳳苦心催解樽節固
自有以致之然亦地方原有此物力尚多因循
積逋云耳蓋濟兗東三府俱解本色青登萊三

府俱解折色每歲共得銀二萬九千八百六十一
餘兩不係額支實屬贏餘除見銀勒令解部
以後卽以此銀坐定該倉解京充餉是亦無損
倉庾有益軍儲者也推之津臨淮徐等倉亦宜
遂無可括如德州倉者臣簡各倉循環文冊俱
有貯存銀兩多寡不等但其或積餘或見支尚
難懸斷耳合無遵累年之成例查倉廩之積備
暫行搜括以助軍興徐加講求以爲定額所謂
不加賦而財用足者亦或一道也惟望司庾各

官同心急公委曲補濟庶有當耳異日回部者
數卽以多寡爲殿最可也以上三款在鹽筴直
因天地之美利而稍爲推廣在倉庾亦因地方
之儲蓄而曲爲搜剔務期涓滴不作漏卮纖毫
悉充公帑庶幾有裨軍興於萬分一耳伏候

聖明裁督施行

崇禎三年二月十六日具

題本月十八日奉

聖旨這條議措餉三款有裨軍興便着依議申飭行

康寧壽考

欽此

金花積逋認罪披誠疏

奏爲金花積逋上厯

聖慮謹認罪披誠仰祈

宸鑒事戶科抄出該

內承運庫署庫事御馬監太監董實題爲

內帑十分匱乏外部借留難繼伏乞

聖明勅部設法嚴催照例恭

進以昭

祖制以重

上供事崇禎三年二月十二日奉

聖旨金花銀兩上供急需該部一任拖欠且動輒那
借不還急公何在這奏內欠數着各撫按同差出
各官勒限嚴催違悞叅處已解在途的着經過地
方護送速解不得逗留該部借過的着卽補進舊
例每年額折二十萬兩作何支銷一併查奏該衙
門知道欽此欽遵微臣仰奉

明綸俯躬隕越隨咨都察院行各省直接臣及咨各
省直撫臣同催餉京卿與守催差官勒限督催

其已解在途者責令臣部題委主事劉賜桂著落經過地方護送速解不得稽遲外竊照金花爲

尚方之用與邊鎮軍需諸司經費不同乃至累年告逋屢借未償臣實司計臣罪安逃幸賴

聖度如天但責以查催補進而未卽加

斧鉞之誅臣敢不矢捐犬馬圖效桑榆而臣一腔血誠有不得不鳴籲于

君父之前者查省直金花歲額共一百一萬二千七

百兩有奇自臣待罪計部凡一年有半於茲矣
按以考成之法應完金花銀一百五十萬餘兩
而臣任內已完一百四十萬二百餘兩僅欠十
萬餘兩則以歲前虜警途梗解官裹足之故今
道路已通外解漸且輻輳無虞又欠據內臣奏
稱欠數至一百八十餘萬實係從前積逋匪伊
一朝一夕臣履任後節次移文督催不啻舌焦
頽禿就中惟南直江西二處所欠最多臣於元
二兩年飛檄頻催不遺餘力案牘可考先是屢

劄南直守催中書孫光裕催解過銀四十七萬
兩及光裕差滿續差中書彭堯泰接踵往催復
於二年七月內差中書馬斯龍往江西守催俱
現在彼中督促未回其拖欠各官臣於二年五
月內已題叅南直蘇松常府州縣推官王瑞旃
等十員七月內復題叅江西南昌等府知府彭
期生等九員俱照例住俸罰俸降俸降職現在
戴罪催徵蓋臣部爲錢穀受成之府所以振廢
起頽者惟有差催叅罰二法曲法徇情而任人

拖欠代人受過臣愚萬不出此惟是已差催矣
而輸解未遑已叅罰矣而掛欠尚多此則臣愚
德非望輕不足鼓倡省直之同心誠負愆莫可
贖耳臣又捧誦

明旨謂臣部那借不還而繩以急公大義臣益不勝
惶怖欲死思自奴酋發難十餘年來前後徵
恩發帑爲數甚多當臣受事之初簡閱案牒業知
上供無可常貸之理

大內亦非不涸之藏所借

帑金三次共二十一萬八千餘兩一在崇禎元年
十月適值寧遠兵譟之後二在今年正月又值
逆奴深入外解中斷之時皆事勢窮蹙感萬不得
已然後冒昧以

請除前次補進五萬兩及近題補六萬八千餘兩外
尚欠銀十萬兩臣耿耿在念寢衣爲之不寧俟
外解稍贏卽當如數恭

進寧敢分毫稽逋以速罪戾乎至於舊例每年額
折二十萬兩臣搜稽故牘始於萬曆六年欽奉

神宗皇帝傳諭加增買辦銀二十萬兩維時完鑄之
司不過就太倉常額那移以進非有額外派徵
也節經前尚書趙世卿具疏

請停已奉有俟內庫積剩自然停止之

旨浸假至萬曆三十三年秋冬二季則太倉告匱欲
進而無可進矣萬曆三十七年十二月又經趙
世卿累疏懇

請復奉

旨買辦銀兩既說邊餉急缺准陸續補進而向來寔

不能補也至泰昌元年又該尚書李汝華疏

請開銷奉

熹宗皇帝聖旨邊餉方急這掛欠買辦銀兩仍存原數俟國用稍充再議欽此此每年額折二十萬兩之始末也夫金花

內庫所徵與太倉銀庫所入各有定額方萬曆初年太倉老庫存貯積數百萬自

內庫加增買辦銀二十萬兩每歲取之太倉而太倉之積日縮故始猶可以彼此支吾而後遂至

於瓶壘交罄今庫貯既無贏餘軍興又益煩費
此二十萬買辦之銀臣雖不敢補前人之贖請
祈開銷然又不敢諱沿革之詳據實查奏總之
臣技已窘臣齒更衰卽

御前急需且不能如數完解致厯

聖心之焦勞況此外軍

國重務千瘡百孔何以勉強撐持臣前疏投効自
以溺職已見補過無期寔出中情絕無矯飾而
微誠未能上達臣晝夜私心踧踖故復瀝血備

陳下情願蚤就

謹斥無重軍國之誤伏惟

聖明矜督臣無任激切屏營之至

崇禎三年二月十七日具

奏本月二十日奉

聖旨覽奏金花銀兩南直江西欠數最多顯是經營
司道不行振刷已有旨着各撫按同差出各官依
限嚴催爾部再通行申飭補借帑銀未完的還着
照數續進額折買辦年例俟事平再議欽此

查明門軍銀米支銷的數疏

奏爲遵

旨查明門軍銀米支銷的數據實回

奏事戶科抄出兵部職方司主事廖大亨奏爲門
軍成額有數錢糧支銷參差謹據實奏

聞仰祈查明更正事等因奉

聖旨該部查明具奏欽此欽遵抄出到部臣聞

命自天惶悚無地先是臣於本年正月十九日因見
錢糧不敷門軍巡軍等項支領鹽菜口糧日久

欲比管軍之例更番給發以示節省當晚燈下
草疏速喚經承書役劉弘德查算支過銀米數
目比時各門分管原冊一時不及取齊致詳止
就臣前所奏

御覽底冊銷算就中鹽菜有與城軍煤炭姜椒總入
一項支領者臣令剖析明白止將原來官軍清
數查算隨據開具軍丁銀米之數臣妄意以爲
不差一時失簡遂爾入疏實不知其中有錯誤
也緣各門皆係十日一放鹽菜獨

廣寧門於底冊上誤將十日寫作五日及查該門
官軍原額三百三十九員名每名日支銀二分
每十日共該銀六十七兩八錢查該門十二月
領銀六十八兩內已多銀二錢該書因冊少五
日不知細心磨勘謬自加增以役過四十日總
算遂致浮出官軍三百四十一員名浮出銀二
百七十二兩八錢浮出米二百七十二石八斗
其實未曾多支又底簿

東直門城軍一項該書不細心分別復將城軍誤

開門軍項下浮出官軍二百五十二員名浮出銀二百一兩六錢浮出米二百一石六斗通計多銀四百六十兩多米四百六十石誠有如兵部司官所查明舉發者蓋以軍興孔棘錢穀紛紜數目煩瑣微臣目力有不及周而書役又輒有錯誤茲其所爲承訛而襲舛也惟是門軍鹽菜俱係坐門司官具呈請給口糧亦繇各倉運送坐門司官親收親放不落吏書之手間有開銷未盡復於下次支放或仍還官收貯錢糧原

自清楚此臣部中衆耳衆目所熟悉也近因坐
門事竣司官又復造有清冊可據祇因門軍巡
軍俱係兵部臣題疏後得

旨更番給發鹽菜口糧遂移兵部知會又經兵部磨
對始知有悞臣方擬簡舉請罪忽聞兵部司官
廖大亨業已入

告臣遂屏息恐惶恭

處分竝伏蒙查明具奏之

旨因敢以錯悞之狀具實

上聞竊念臣犬馬有心方欲一鎗一粒死底澄清仰
副

宵旰屬望至意不虞病曠日甚未能釐剔書役之誤
舛錯參差日復疊見意者自軍興以來屢荷

皇上寬容之恩真是福過灾生似有天幸其鑑者臣
沈暗疎陋罪復何辭除將該書役痛懲究治改
正銷算外謹席藁待罪臣可任戰慄隕越之至

崇禎三年二月二十二日具 奏本月二十八奉

聖旨卿不必引咎還着該管官具實回奏欽此

捷伐方張轉輸宜預疏

題爲捷伐方張轉輸宜預謹叅求古制斟酌時宜
以佐軍興急務事臣聞師行糧從自古記之行
百里者累一日之糧行千里者累十日之糧又
曰大兵在前輜重在後是兵之與餉時刻難離
而緩急相依者也古人於營伍中單立輜重一
營兵資於餉餉以兵運是督兵之官卽運餉之
官載之史冊未見有苦餽餉之難者今胡盡失
其意也總之調兵者不過曰徵發期會吾事畢

矣而供億艱難膜不關心用兵者不過日爰在
啓行吾責盡矣而乃畏糒糧置之不問稍不給
而怒目疾呼正色切責臣部適當其難備極其
苦夫轉運糧糒用許多手脚費許多氣力尤非
一言一語可完轉運之局我

皇上聖明洞見萬里前

允臣部之請借重津卻往來通薊設法督運又立陸
運餉司一員從河西務陸路轉運漕米以供薊
鎮行糧但政匪先圖事屬剝立當殘破之後招

集車輛頭畜尤覺不易亦既盡力拮据矣此特
就運薊者言耳如三屯呼請本色時刻難緩轉
運所經之地正虜騎出沒之所風鶴驚魂人人
裹足又何益於緩急之數乎頃又接兵部咨監
紀主事丘禾嘉稱劉鎮華兵移駐開平會同祖
帥合兵集勦將復灤而窺永責令臣部轉運本
折供應當此會勦之期用兵非一處供億非一
所若不酌一常便之法先爲料理萬一四處號
呼薊鎮又烏能神輸鬼運分身而應耶前撫臣

方大任欲倣古人運之法然亦偶一行之耳兵
丁多遊食之輩荷戈從戎義無所逃復責之竭
力轉輸萬萬不肯因師其意而變通之不若卽
於荊州城內或挑選營兵或召募鄉民務以膽
勇精健土著爲主約得二千分爲二營各設一
將統之名輜重營每營給騾三百頭兩人小車
二百輛其騾先令

京師五城每城各買三十頭每頭價值自十兩以
上至十五兩以下務以齒嫩力壯爲主買完速

解薊州交割付令土著健兵喂養駝糧其餘再
行保定撫臣檄令保河州縣每處買一二十頭
自可頃刻而集此外再買小車每營二百輛每
輛價銀在二三兩之間卽順天附近州縣亦可
分頭收買與前騾頭俱解薊州軍前應用督撫
調度將領約束司道差撥其兵照例支給月餉
不妨從其優厚至於騾頭草料比照馬乾則例
按月給發無事則令操練器械有事則令轉運
糧草若利其速則專用騾頭駝運若利其多則

專用小車載運而騾頭牽拽以行其買騾買車
置袋銀兩臣部卽行措處督撫加意料理務於
半月之內整飭兩營車畜更番轉運蓋短僱人
夫借倩車畜其價頗廉遇敵則掉臂而走召募
兵丁置買車畜其始雖費遇警則飛輓可前大
都每營千人當以一半運糧一半護送遇賊戰
者自戰行者自行彼此照管可無阻礙之虞或
間道或夜行相機前進期免疎虞之患萬一大
敵當前再撥重兵防護此後進勦之兵尚憂糧

糗而慮脫巾者臣未之聞矣所慮軍丁不肯
意喂養驟頭以致瘦損倒斃此則將領中干之
罪也目今督撫二臣授事方新殫精布置資糧
伐而壯我武臣盖有厚望焉如果臣言不謬伏
乞

勅下臣部移會薊遼總督順天保定巡撫特立輜重
二營選募軍丁收買車畜聽候不時轉運三軍
幸甚臣部幸甚

崇禎三年二月二十二日具

題本月二十四日奉

聖旨關薊兵餉呼請甚急設立兵營置買車輿著行
督撫依議措辦該部還將額餉本折一面星速催
發毋致耽延欽此

題覆閣部關薊餉銀疏

題爲臨敵之兵不宜更饑久缺之餉不宜再緩懇
乞

聖明亟賜多發以揚士氣以滅狡賊事本月二十一
日恭接

御前發下閣部孫承宗題前事奉

聖旨關兵待餉甚殷臨敵急須儲賞該部將歲額銀
兩作速多發軍機重務毋得少有遲延致以匱乏
悞事罪責攸歸該衙門知道欽此又准兵部咨爲

塘報事等因題奉

聖旨據報關兵已抵開平須餉甚急該部速與運發
仍設法接濟崔爾進既回部通州督運還着翟鳳
翀用心料理該衙門知道欽此具覆間又准總理
馬世龍手本爲會請關兵月餉以救枵腹以便
驅戰事內開原帶山海及關外馬步各營官兵
共二萬二百五十八員名各支不等每月共該
銀三萬五千二百九十兩外有自備鞍馬未支
廩糧勤

王官十六百餘員名每月約該餉銀一千一百餘兩
自去年十一月至今二月計四箇月通共該銀
一十四萬五千三百餘兩合無軫念戍防之苦
卽爲查發等因又據薊州餉司何朝宗稟稱本
月十八日蒙本部發到銀三萬兩卽于三日內
支給已盡而候支行糧者尚欠六千餘兩候支
主客兵二月餉者欠一萬四千餘兩無銀可支
目前有兵譁之兆乞卽搜發若干以安兵心等
因又據山海道兵備王楫呈爲改運兵餉事內

開東協所屬燕河建昌山海石門四路兵馬原
食永平糧餉今永平未復一槩仰給關門乞將
應發永平糧餉改併山海以便支給等因各到
部該臣等看得比歲關寧月餉雖有匱乏之時
那前補後缺額無多邇者變出意外軍興旁午
以新餉而禦舊餉之窮以行糧而侵月糧之額
數月以來不惟道路梗塞而運無可運亦且呼
號然眉而發無可發關寧缺餉通計至七八十
萬臣前發銀十一萬兩繇津門海運以杯水救

車薪憂心如焚極知其少而無如不能爲無米之炊何也茲奉

明旨又復搜括庫中所有及續到者派發九萬見在差官朱大成等起解合前十一萬則二十萬矣仰念我

皇上睠焉東顧敢不竭蹶供億以資飽騰及查總理馬世龍所統入援之二萬餘人與總兵祖大壽入援開平之數千均屬關寧食糧之數薊門多一兵馬則關門少發一分糧餉與於此卽減於

彼非有兩也。祖兵入援內地，志在就食，亦慮轉運之艱難耳。臣部已差委官解銀四萬，以二萬作月餉，以二萬貯豐潤，開平作行糧，本折之費而馬帥又爲關兵請四閱月之餉矣。無論外解有限，不能一頓齊發，且行月兼支。

都門從來未有此例，恐各兵尤而效之，照例索討。卽將臣粉身碎骨，不能飽各兵之欲也。念馬帥忠勇誓師，何可少拂其意？或權宜通融，先發三萬六千餘兩，以給一月之餉，俟庫藏少充，再發。

一箇月而今年正月所支一萬六千兩亦宜一體通融銷算并應扣抵月餉者也據部發之見數馬帥三萬六千祖兵四萬以關寧月餉分餉關寧之兵合之海運二十萬則二十八萬有奇當此匱乏之時而儘力支撐似匪存乎見少矣不特此也計薊州主客援兵其月支鹽菜月糧等項所費不過六七萬及查二月十三日發新舊餉三萬五千兩不料解到之日兩日卽行放盡大聲疾呼臣不得已而又發新餉二萬舊餉

一萬差官王有功陳夢吉等領解矣臣部非不涸之源而發者業已傾囊用者全無樽節未有不立刻坐困者也臣之慮更有進於此者夫關兵援薊於行糧外通融給發月餉以昭

皇恩之逾涯然秦晉之健兒其荷戈薊門者誰非勤王之旅誰無可恤之私亦當於年例銀兩支給月餉一箇月

同仁一視鼓舞宜先但未有冊報官軍確數亦未知彼中領餉規則仍當行令冊報以便酌給候於

該鎮年例扣除其列戍

都城與防守通昌者不得引以爲例至於馬匹既支本色料草無論關寧秦晉似無行月兼支之例尤宜移會酌議者也再照薊門主客營兵數目增減了無的據旣索目前之餉又找從前之欠餉司位卑權輕不便裁抑督撫拜

命伊始所不當詳爲稽核而一力主持乎永平失陷東協兵馬盡附關門其給發糧餉餉司任之而查核之事應責成關內道無容再議者也旣各

具題移會稟討前來相應覆

請恭候

命下臣部移文各該衙門遵奉施行

崇禎三年二月二十四日具

題本月二十七日奉

聖旨據奏發過關薊餉銀知道了還急措辦接濟毋
特頻頻呼請行月兼支無例何得輕徇卽云暫爲
通融亦須申明絜令勿生軍心該部酌妥行欽此

原缺

條議輜重營規制疏

欽奉 聖諭恭報錢糧疏

查明塩課數目回奏疏